

祀南斗星○以南道揆為承旨○乙卯○丙辰○丁巳 上幸 明陵親祭
先王 先后展謁 翼陵後還宮○戊午 命加守 陵官礪城君楫侍 陵
官及叅奉忠義等各一資遵舊例也 己未右議政趙泰耆自縣道累疏辭職
上溫批不許遣史官諭之○庚申庭試文武取文科尹心衡等七人武科朴龍
采等一百四十八人○三月朔壬戌○癸亥夜自一更至五更乾方坤方巽方
有氣如火光○甲子以金演為都承旨李浣為掌令洪錫輔為大司諫李重協
為修撰俞拓基為校理徐宗燮為副修撰洪致中為大司憲金始煥為承旨宋
必恒為執義金龍慶為持平洪龍祚為正言○憲府申前啓又劾內乘梁益標
性本狂悖積有疵謗 朝廷方且滌瑕收用而自燕先來不悛舊習多有駭舉
請汰去 上並不從以兩公主房事 特命曰稟于 慈聖則 先朝傳教不
翅明白嚴切則到今更為提起殊涉未安決不可允從為教亟停勿煩內帑非
古也而無後公主房免稅者尤無意義臺論誠得體 上不唯不從又歸重於
慈教而拒之殊可慨已○諫院申前啓且論今番司馬榜中有被墨名之罰而
赴舉得叅者士習之駭恠莫此為甚請 令該曹查出拔去 上並不納○乙
丑自己時至未時日暈○丙寅○丁卯已時日暈暈上有冠下有履色皆外赤